



ОРГАН ЛЕМКОВСКОГО СОЮЗА.

Выходит в четверг около 15-того и 30-того каждого місяця.

Редакция и администрация в Крыниці. — Адрес: „Лемко“ Крыниця.

Пренумерата в краю:

30 грошей місячно,
1.50 зол. полрочно,
3 зл. рочно.В Америці: 50 центов полрочно,
1 \$ рочно.

В Чехословакии:

2 кор. місячно, 9 кор. полрочно,
18 кор. рочно.

Конто чекове Нр. 404.155.

Отдадимме всенародный поклон.

Зближаты велика и сумна рочница...

Незадолго мине 20 роков от той хвилі, коли то над цілом Европом запалилося страшне, чорне пламя, зачалася грозна, світова война. По вшитых краях зачали пересувати ся непроглядны полчыща узброеного от ног до головы войска. Врагы наступали на себе...

Але перше чым загуділи кольосы-арматы, перше чым змірялися два неприятельскы войска, уж тяжко застогнала наша Прикарпатска Земля. Море слез и кырви обагрило єю. Горко зарыдала каждая руска громада от Сокаля аж по Санч. Заломила руки руска Мати...

Так, то факт! Першу кровну жертву в світовой войні принюс наш русский народ в Галичині.

Заколысалися шыбениці, зогнулися придорожны дерева под тягаром трупов, выстрілили першы патроны на подворях вязниц, переполнилися вшитыкы криминалы. Через села, міста гнали непроглядны толпы арештованых людей!

Штож-то за злочинцев, што за страшных переступников так тяжко карат „высококультурна“ австро-венгерска держава, котром рядиш „Божою милостию“ цісар Франц Осиф I.

То не бандитов, то не злочинцев-здрайцев гнав німецкий жандарм, ци вояк на муку и немьнучу смерт, ніт — то вели русских людей: молодых и старых, жен и дітей, газдов и священников, учителей и адвокатов. Их вшитых едином „вином“ было лем того, же они рускы, же руска мати их родила!

Так, знай и чуй, цілый світе, же в XX століттю людей гнали на смерт, людей казнили серед страшных издівательств за их народность, за их переконаня!

Чуючы свою прудку загибель дрантива „тюрма народов“ австро-венгерска монархия совершат свой остатний „подвиг“, выказуе свое „геройство“ в отношенню до своих безборонных и неозброеных граждан. Чуючы зростаючу силу словянской идеи тратит розум всевладный до тепер німец и... пе кров своих невинных жертв.

А што найсмутнійше, найстрашнійше, же в том диком пырі сердечні помагал німцам и мадярам наш родный брат-каин, німецкий запроданець, котрый перекрестился з руснака на украинця. Засліплений обіцянками стратил он людске сумліня и в радосном усмішку доносами и фальшывыма свідоцтвами затягал петлю на шыи свого брата-руснака. Зберался уж аж и правити парастас по зненавиджених „кацапах“!

Море крови... Шыбениці, розстрілы без конца...

А тых, што не дали рады постріляти и побивати, впакували до вагонов и повезли далеко-далеко до страшного пекла, котрому имено: Талергоф. Там в зимні, голоді, хворотах и звірских муках пропадал цвіт нашого народа... По трох роках знесли тоту вязницю, розобрали бараки, решту помордованых русских людей пустили домив вмерати, а місце того зровняли з земльом. Лем єден слід не могли затерти, а то невеличке місце „под соснами“, де сном вічным заснуло около пят тысяч русских людей — наших родных.

Спят они там в далекой чужой, німецкой землі и неє кому поставити трираменного креста на их великой могилі. Не дойде там несчесна вдовиця, не клякне над их гробом бідна сиротина и не зросит сухой землі слезами-молитвом...

Але 31. мая т. р. отбудеся во Львові з'їзд Талергофцев, з'їзд их родин и вшитых тых русских людей, котрым дорога памят великих народных мучеников, погыбших в часі войны так в краю, як и на чужыні в Талергофі, Терезині и т. д.

Ден тот буде днем всенародной тризны, всенародных поминок. Прийдут там тысячи русского народа, штобы разом помолитися на гробі перед выбудуваным красным памятником-крестом, отдати честь вшитым героям, жыты свое отдавшим за святе руске имя и пройти походом по улицах того Львова, де 20 роков тому рижноплеменна толпа издівалася над нашима невинными арештованными.

В том великом дню не може там бракнути и нас Лемков. Мы тыж, може и веце, як другы, принесли жертв на олтар Руси. Дня 6. вересня 1914 р. на подворю суда в Горлицях зложыл свою голову зианый нам о. Максим Сандович зо Ждыні, дня 28. вересня на городской стрільниці в Санчі зостали розстріляны вшитыкыма любимый о декан П. Сандович з Брунар выж. (отец 9 дітей!) и его сын Антон, дня 18. січня 1915 р. повішено на рынку в Грыбові Теофиля Мохнацкого з Білцаревой. Розстріляно в Кошыцах честного газду з Крыниці Онуфрия Крегля — повішено на вербах в Пивничной семох радных из Вірхомлі Великой и много-много других страчено. В Талергофі мали мы тыж гарде представительство. З наших гор было там больше як 2 тысячи людей, з чого около 200 уж раз на все остали там „под соснами“. Для приміру подам: Білянка — 16 (з чого

вмерло в Тал. 3), Вортне 16 (померло 3), Высова 22 (померло 8), Вышовадка 4 (померло 3), Гладышев 20 (померло 4), Ждыня 25 (померло 2), Крыниця 26 (померло 3), Лабова 22 (померло 2), Лабовец 10 (померло 3), Лосье 33, Ольховец 20 (померло 6), Поворозник 11 (померло 4), Тылич 19, Сянок 27 (померло 4) и т. д.

Каждый культурный народ высоко цинит і шанує памят своих героєв, памят своих предводителей пострадавших за идею. Не зостанте и мы зозаду!

Вышлимме до Львова свое достойне представительство! Знам, же зараз повісте мі, же не оден поихалбы, але штож кед неє грошей. То правда, але при доброй волі и охоті тых пару злотых у многих ищы ся найде, — тым больше, што буде и знижка на колеи. Откажете собі даякы иншы приємности, а отложме на ізду на з'їзд!

Идме на з'їзд тым больше, жебы доказати же Талергоф то наша руска жертва-святыня. Бо як штотраз частійше чуєме, тоты каины, котры нас гнали на шыбениці и до криминалов, тепер ищы кричат, же то их мучыли в Талергофах. Крикнийме перед світом, же то лож и фалш, як и ціле их украинство!! Проч от нас з закрывавленыма руками!

Пригадайме им знаных нам на Лемковщині свидков-доносителей, шырых украинцев: о. М. Дороцкого зо Злоцкого (котрый тепер ищы має смілость в „Укр. Бескиді“ писати одозви „до братів Лемків“ и подписуватися яко „широ любячий“ ци „отданный Вам“!), о. В. Смолинского з Новой-Веси, учителя М Гуцеляка з Білцаревы (головн. свидка на суді Сандовичей), учит. А. Гусака з Мохначкы, учит. Нищоту зо Снітниці, учит. С. Сороку з Фльоринкы, П. Ключника и т. д. — имена котрых добрі вбилися нам в памят!

Я сам не талергофец, бом тогда был ищы дитином, але я сын пок. талергофця и тым горджуся. Яко такой звертамся ту передовсім до нашей лемковской молодежи, до сынов и внуков страдальцев-талергофцев и всей русской молодежи: отдайме честь-хвалу нашим предводителям и родичам, нашим народным мученикам за Русь!

Организовано в своих лемковских строях возме масову участ в Талергофскому з'їзду во Львові 31. мая т. р.

Поклонмеса перед прахом замучених!...

Р. Г.

До газеты долучае чек П. К. О.
просиме присылати
пренумерату!

ПЛАН РЕФОРМЫ РОЛЬНОЙ.

В звязи з остатними нарадами господарчма Правительства Гн министр рольництва Наконечников-Клюковский уділил представителям пресы слідующих информаций. Опровергнул он передовсім мніє, што в остатних часах Правительство нич не робит над поправом устрою рольного в Польщі. Тото не покрыватся з правдом повіл Гн министр, бо в 1930 році скомасовано 509 тисяч гектаров, а в р. 1933 402 тисяч гектаров и распарцельовано 83 тисяч гектаров.

Мале ослаблене выкликали трудны обстоятельства господарчы, але работ не перервано. Потом гн министр пояснил значыне основаного в р. 1932. Фонда Оборотового Реформы Рольной. З того то фонда финансиується акцию перебудовы устрою рольного. На доходы фонда складаються належитости добывателей державных грунтов и доходы рентовы по бывших комиссиях колонизационных и аграрных Банках, а также от властителей дробных варстатов рольных, котрым Правителство переводит комасацию, мелиорацию, або парцеляцию. Тот цілый фонд ест перезначаный на поднесенє уровня господарчого села и то через парцеляцию. Комасацию и мелиорацию, а также через знесенє сервитутов селянских и поділы сполок. Правительство приготовило плян акции над перебудовом устрою рольного на период пятьох літ, предвиджуючы на тоты работы суму 181 миллионов злотых.

За тоты грошы має переводитися дальше комасации, парцеляции и мелиорации грунтов.

Найбольшу увагу звертат Правительство на парцеляцию, а то тому, што населеня прибиват, як также и по поводу, што великы варстаты рольны пережывають кризис, и будут змушены до такой ликвидации. Понеже надросту населеня сельского не можна отпровадити до центров промышленных, ани также на эмиграцию, выдвигатся конечность переведеня плановой колонизации внутренней и друга конечность переведеня комасации господарств малых. На парцеляцию перезначат ся в тых пятьох літах 625 тисяч гектаров а на комасацию 400 тисяч господарств на пространстві 2 милионы 300 тисяч гектаров.

Чысла тоты вказуют, што Правительство пиоектує великы работы, штобы облегчыти положыня села. Сут стараня, штобы обнижыти кошты комасации.

На работы мелиорацийны предвиджено в том році 600.000 злотых, а на четвертый и пятый рок плана Правительство перезначат по 20 миллионов рочно.

На основі высше наведеного можна надіятися, што в продолженю найблизших 5 літ справа рольництва в Польщі посунесе сильно наперед, а само рольництво поднесесе.

Польша и Совіты

навязуют штотраз близшы отношеня и боронят спокою світа. — Новый амбасадор совітский Давтьян запросил до себе представителей польской пресы и поинформовал ю о отношенях медже Совітами и Польщом в такой способ:

„В остатних часах политычны отношеня медже С. С. С. Р. и Польщом поправилися. До взаимного довірия причынился в значной мірі пакт о неагрессии.

Остає ишы дуже до зробленя, штобы близше запознати общество польске з тым, што

направду ест в Росии, и совітске общество з Польщом и штобы устранить всякы сліды упереджыня и предразсудков, якы могли заховатися до тепер.

Одночасно натянута ситуація (положенє) международна вымагат соокупленя вшыткых сил до борбы, штобы ухоронити світ перед войном.

Велике значене для розвоя нашого сусідского отошеня мають справы господарчы и в той области жде нас ишы великий труд.

Отношеня торговельны медже нашыма торговельныма організаціями и промыслом польским, котрый уже от давна достарчат нам промышленных товаров сут того рода, же позволяют надіятися дальшого учучшеня в той области. Дальше заявил Давтьян, што СССР не стремит до захвата ничьей землі ани до войны, и вшыткы свои силы напругат в направлению экономичном.

Малпа и прозерало.

Мала малпа прозерало
(И малпі ся раз удало)

А была брыд и машкара
Хоц и не барз ишы стара.

Покрутила ним в гигалях
Обернула го нарубы
Обнюхала, обмацала,
Спробовала взяти в зубы.

И уж го шмарити мала
Бо ся ей доцяп знудило,
Але зырка нехотячы
И взрїла в нем свое рыло.

Здивилася: „Што за пика“
Пыск шырокий, клапты руды,
Уха брыдки, як у дика.
Хыбаль брыдшой ніт паскуды.

Дораз кличе на сусідку:

„Оле, смотте кумо на то!
Взрїте такую малпу брыдку
Як вы кумо, дайме нато“.

А кума ей на то рече:
Высте кумо дурноваты
Вы сте сами в прозералі
То ваш портрет, мате знати,

Як мі не повірите
То звїдайте ся теляте
Напевно вам правду повіст
Же то вы так выглядате.

И в світі сут такы люде
И дуже их в нашым краю
Што лем чужы видят блуды
До своих ся не признают.

Так як нашы Яничаре
Украинці з под „Бескида“
Не подобатся им Лемко
И наша русска бесіда.

А бесіда наша добра
Давна, бо тысячелітна,
Не така — як их штучна
И фабрычна и тандытна.

Бо в их мові кус слов русских
И тых лем сто и пят взяли
Решта — молдавскы, кус монгольскых
И кус „вчени“ выдумали.

Як бы так встал з гробу Тарас
И зачал чытати „Діло“
На Камчатку втюк бы зараз
Же аж бы ся закурило.

Сват.

Росия и Япония приготавлиются до войны.

Харбин, 26. квітня „Харбинское Время“ пише што совітский Дальрайком провадит работы, стремлячы до вооруженя желізных дорог котры лучат позиции рижных стратегичных пунктов на далеком всході. Тоты работы мають на цілі оборону границ перед Японией. Видно з того, же хоц так Япония, як и Росия все заповідает же войны не хотят, положыне там ест не певне.

Япония змінила свою назву и называтся тепер „Ниппон“.

Талергофский З'їзд

отбудесе 31-го мая т. є. в понеділок, в лат. свято Божого Тїла. — Кличеме всю руску общественность подготовитися до того народного торжества.

Місцевы и повітовы Талергофскы Комитеты повинни постаратися о многочисленность участников и зробиити нешкодливыма ложны слухы, же з'їзд не отбудесе.

Позволене на отбытє з'їзда уж ест. На з'їзд заповіли свой приїзд представителі Карпатской Руси. Встрїтме же 20 літя народной трагедии и жертв мученичества в Талергофі, як воскресене до нового жытя! Призываєме вшыткых до свесторонной подготовки того историчного юбилея страдань и крїпости духа Галицкой Руси!

За Центр. Талергоф. Комитет во Львові:

Секретар:

Др. В. Р. Ваврик

Предсідатель:

(—) Антон Гулла.

Лев Троцкий во Франци.

Еден з героев русской революции, котрого диктатор Росии. Сталин вигнал — осіл перед кількома роками в Турции. Там жыл он кілька роков, а потом позволило ему французске правительство замешкати на острові Корсиці. Троцкому Корсика не подобалася и он перенесся найперше до Рейн, а потом до Барбисон коло Парыжа. Троцкий зобовязался не заниматься политычными справами. Газеты не писали нич о том, де он жыє а то по той причині, штобы населене французске и руска эмиграция не докучали Троцкому.

Недавно французска полиция зробила у него ревизию и нашла у него дуже большевистской литературы. Французскы газеты подняли тепер великий крик и жадают от правительства выселеня Троцкого. Біда лем, же жадна держава не хоче Троцкого прийняти. Остатни газеты доносят, же Турция годится его прийняти.

Совітска Росия входит до Лиги Наций?

Газеты все росписуются о том, же С. С. С. Р. буде принята до Лиги Народов.

Але совітске правительство поставило Лигі Народов такы жаданя, на котры, не годятся не лем Англия — але также цілый ряд других держав. Медже иншыма жадат совітске правительство сталого місця в Совіті Лиги Народов, а также признаня совітского правительства через вшыткых, котры входят до Лиги.

Также и Германия хоче ввойти назад до Лиги и жадат также сталого місця в Совіті Лиги.

Манифестация приязни польско-французской.

В неділю, дня 22/4, приїхал до Варшавы французский министр закордонных справ Гн Барту, штобы дати доказ приязни, яка лучыт Польшу и Францию. Министр Гн Бек принимал гостя обідом, в часі котрого так министр Бек, як и Барту выголосили промовы, в котрыг подчеркнули приязны отношеня медже тыма, двома державами. В понеділок министр Барту, прийнятый через Гна Маршалла Пилсудского забавил у него полторы години. В часі розмовы, котра мала характер сердечный впали ишы раз слова увіренія о тісній приязни обох держав. Тота приязнь дає ручательство спокою, порядку безопасности цілой Европі. — Визиті той приписуют велике значене. З Польщы выїхал министр Барту до Чех.

Жертвам Талергофа!

Вы спите сном мертвым в могилах
Холодна Вас земля прикрыла
И шумят Вам пісні жалосны
Надгробны березы и сосны..

Сут такы, што о Вас забыли
Сут рабы без чести, сумліня,
Хоц з Вами неволю пробыли
На гробы Вам мечут каміня.
Чувств людских ся вшыткы позбыли
Янчаре, выродки, говеда
И плюют на Ваши могилы
Продатна и здрадна череда.



В середу, дня 25. квітня 1934 помер директор книговод кооператива „Прогрес“ в Крыниці бл. п. Орест Мончак — прожившы 26 літ. Смерт послідовала от воспаленя легких. В покойном тратит кооператив чесного, солидного и преданого сотрудника, котрый не жалувал труда для народного добра.

Тратит в Нем ціла Сандеччына доброго и идейного организатора, а Русь любяшого Сына. В похоронах взяли участь кромі институций крыничских такые представителі читален сусідних сел. На кладбищі попрощал Покойного в коротких словах Г-н М. Трохановский, представляючи его жыте яко красны примір, як належит службыти своєму народови.
Вічная Ёму памят.

Спирт для Америки.

Польша буде достарчати спирт Америці.
Видно з того, же американці мочат тепер часто свои горла — хоц ест там аж 11 миллионов безработных.

ШТО ЧУТИ В СВІТІ.

Святкова Велика. Село Святкова належало перед войном до свідомых русских сел. Была у нас читальня им. Качковского, руска Дружина и красна библиотека. На читальняный дом звезено уж материял, аж ту выбухлы война, котра зруйновала вшытко: книжки з библиотеки пропали, а дерево розобрали добры люде и ани думают его отдати.

По войні за стараньом нашего подвижного патриота священника О. А. Криничкого и килькох свідомых господарей отновлено зас читальню, котра початково розвивалася дуже добре. Молодеж горнулася до ней и дала килька забав и представлень, медже другыма також „Книжник“ О. К. Чайковского. Але біда не спит. Пришол учитель Осип Звирик, котрый уходил долгый час медже нами за руского — бо все сам о собі так бесідовавал. Он то поволи и незначно почал вщеплювати в школьны діти украинскы идеи и з тых дітей виросло потом пару украинчыков; правда их недуже, але и тоты приносят нам встыд, бож то дотля в нас не бывало. Тоты доморослы украинці не возмут руской книжки ани газеты до рук — нас называють жацапами — так ладні их выучыли. Провод медже нима провадят Отец Лабковский и Флюкс Яновский. Они то оба разом з украинским священником О. Димитрием Ступаком пробуют будовати шыроку украину от моря до моря — але им не дастся то зроби, бо на счастья решта молодежи триматся твердо рускости и не даеся баламутити. Тым однак хочеме повісти: „не теряйте куме силы — не вчыйте нас нич нового, бо мы сами знаме, як нам треба жыти и во што вірити, баламутити и рижнитися не даме, а вшыткым непрошеным учителям можеме дати болючу отправу.“
Правдолюб.

Сквіртне невелике село в повіті горлицком проявлят постоянно оживлене и діяльність, благодаря управительови тамтешной шко-

лы Гну Юрковскому. Он привернул зас до віриє до кооператива, котрый выказує што-раз больши торгы, он заохотил до садоводства, и оживил рух в читальні. Театральны кружок той читальні отограл недавно „Талергоф“ а тепер мае выставити тото представлене по других селах.

Зындранова пов. Кросно. Дня 9. квітня т. р. отбылося открыте читальні им. М. Качковского. На открытиє присуствовало около 300 людей, а вписалося в члены 89 людей. Приіхало также много интеллигенции: Промовляли Управителі школы О. Байко, М. Кметко и Т. Фучыла, делегат Общества Качковского Цебринский и студенты Феленчак и Курдидик. Открыте закончылося деклямациями дітей и отспіванем гимна: Пора за Русь.

Терстаина пов. Кросно. Дня 10. квітня т. р. открыто читальню им. М. Качковского. Собрание открыл священник О. Теодозий Курдидик, котрый в горячих словах призывал людей до обороны своего русского облика и до интенсивной культурно-национальной работы. Потом в коротких словах делегат Цебринский представил просвітительны задачи читален, а студент Курдыдик звернулся з апельом к молодежи и представил ей роль в просвітительном труді. Людей зобралося около 200, а в члены вписалося 66.
Вечером отограно: „Бідна на світі пешена дитина“.

Завадка Римаковска. В страстну пятницу и субботу были в нашем селі учителя. еден з Писаровец, другый з Чертежа. Учитель Ильков з Писаровец выголосил нам реферат о пчоловодстві а учитель Радванский з Чертежа о садоводстві. Оба рефераты были добре приготовлены, а же и людей зышлося много, тому и користь з тых лекций для нашего села велика.

В третий день Великодных свят приіхал до нас делегат О-ства им. М. Качковского з Львова Г-н Михаил Цебринский, штобы заохотити нас до нового труда и будовы читальняного дому, бо як знате уж з газеты „Лемко“ якаси вража рука подпалили нам деревяный читальняный дом.

Здавалобсыя, што вшыткы будут барз рады з того же наше село горнеся до науки и хотілобы станути в рядах сел просвішених. Здавалобсыя, же нашому учительови Г-ну Фучылі будут вшыткы вдячны за то, же спроваджат нам до села своих товаришей специалистов по господарской области. Тымчасом, не знати чом — а властиво знати — не сподобалися тоты науки нашому егомосцьови, котрый дня 15. IV. з казалниці метал громы громы так на учителей як и на Г-на Цебринского за то, же они радили людям приступити до будовы нового дому читальняного. Досталося им вшыткым и Илькову и Ра-



Дмитро: А де то доправды поділся Амброз?

Ваньо: Предчуввал конец світа и втюк на місяц. Хоц ангелы ищы не почали трубити, але люде уж начали з біды ... марніти.

В рочницю Талергофа.

Тым, што жытя в жертву дали
За народну честь
Терновый вінец зложыме
На надгробный крест.

Най их жертва даст нам силы
На великий труд!
Най талергофскы могилы
Вказуют нам путь!

И най память мучеников
Соединит нас!
Всі пойдеме к одной ціли
Вперед, дружно враз!

Побідиме впольным трудом
Діло вражых рук
Не встрашымся их злобы
Ни тюрьмы, ни мук.

дванскому и Фучили, а найвесе Цебринскому. Роскричался наш егомосць на людей так, як на кухарку дома, и заказувал ходити на такы собраня и не слухати таких, што волочатся по світі и баламутят людей. На нашего учителя Г-ну Фучылу выкрикувал, што он был офицером в польском войску и вытігал шаблью на русских, а тепер ест наибольшым ворогом Украины и каже закладати читальні. Кричал так долго, аж люде не хотячы грішыти, повыходили з церкви. Остало лем килькох украинчыков, бо они сут побожны. Правда у когоси згынуло масло и комендант нашол тото масло у Данька Челяка, Юрчыково полотно и кльоц з громадского ліса зашли до Василя Челяка, инших семох ради ходят в ночи до Михала Кирпана, и волят, як в него не світится, иншы ищы любят переконатися, ци конич сухой в загаті Хомяка, але в церкви, то они барз побожны. И не лем в церкви. Як спалилася наша читальня, то они на кильомере от того місця, де она стояла, знимали уж шапки и дяковали Богу, же уж по читальні.

Здаеся, же через тоту побожность их егомосць не пубкикує, не кричит на них, хоц не раз было бы за што, бо были и такы справкы, же вмшалася до них полиция и прокуратория, але за то, не може вздержатися егомосць, штобы не метати громов на тых, котры хотят научитися чогоси, котры горнулися до читальні, штобы там прочитати книжку або почути розумне слово и штобы не поступати так, як нашы доморослы украинці поступають, же як треба было подписати статуы читальні „Просвіта“, котру хотіли заложити, то не было кому, бо вшыткы были караны. Може ліпше былобы егомосць кус и на них увагу звернути, а не интересуватися нашом читальньом!

Член читальні им. Качк.

Усте руске. В селі Усте руске, в домі Семана Цапа, находится, як на село велика салья. Чысто в ней и біло, попод повалу звисают народны ленты и красны паук на середині, а на стінах попріпинаны сут таблиці паперовы з написами маючыма на цілі припоминати людям на каждом кроку, як належит поступати, штобы поднестися просвітительно и экономично.

Тоты темы, яких написы сут до тепер на стінах, переробил з членами читальні минувшой зимы студент Г-н Андрей Гумецкий власне в той салі, бо маленька наразі комната читальняна не могла их всіх помістити.

Госп. Андрей Гумецкий занялся близше организацией молодежи, котру поділил на поодинокы секции.

Так то читальня им. Мих. Качковского в Устю руском, котрой председателем ест уж шестый рок Осиф Дзьоба, поступат як видиме вытревало вперед.

Каждая секция мае свою задачу. Една заповнавала и запознає себе и других з рациональном годовльом худобы, друга з пчоловодством, трета з садоводством, четверта з интролигаторством, инша з веденьом книг и рахунков в господарстві, ищы инша поглублює відомости з области истории и литературы и т. д. и т. д.

О вшытком том писали нашы русскы газеты „Русский Голос“ ч. 8. и „Земля і Воля“ ч. 9.

Завдяки власне секції садовничой з ей проводником Сильвестром Ксвальчыком и його заступником Семаном Пейком посадили люде в Устю той весны больше як 200 деревец овочевых, яких на Лемковщынї так страшно бракує, же цілыма зимами люде праві не коштують так потрібных зеленых овочев. Фаховыма зас порадами при садженю все радо служил організатор секції.

Секція интролигаторска з Антонийом Ан-дрейчыном яко председателем оправила дуже книжок читальняных в тверды окладкы.

Интересно нам тепер знати откаль Влад. Ив. Пейко з Торонто. Онт, Канада подал в американском Лемку ч. 12 з 29. III. 1934, ложны, неправдивы, злосливы, відомости, в котрых цынично наступат на чесного и при-мірного госп. Андрея Гумецкого.

Найже Влад. Ив. Пейко прийме до своей відомости, што газ. „Слово“, з котрой мал черпатн відомости, виходит не во Львові, як пише, але в Варшаві! По друге газ. „Слово“ подає, што молодежи зышлося на ламанчак 60 особ а не 90 як подає автор в Лемку.

Треба навчитися Владиміре найперше чытати, виробити собі об'єктивный суд, а по-знійше братися до дописей!

Коллекту на „Ламанец“ зберал не студ. А. Гумецкий, але Андрей Дзьоба, библиотекар читальні, котрый поробил вшиткы закупы. Грошы за товар ушли частично до Грибова, частично до устьянского кооператива „Сила Народа“, а до няна Андрея Гумецкого ушли грошы за тоты товары яких не было в кооперативі!!

Забава „Ламанця“ была зроблена не для егомосцев, але для молодежи, жебы вказати як можна за маленькы грошы культурно и весело забавитися.

Ламанец постановили мы обходити каждого року и на нем будеме ламати вшиткы нашы злы стороны, нашы особисты и народны вады и што найважнійше неохоту до книжкы.

Доход зо забавы обернено по покритю вшиткых коштов на свѣтло, якого мы ужывали в зимі.

„Батюшку з матушком“ и ей сестром як и посла Стапинского запрошено аж в остатних годинах. Першых на желанє участников забавы просил Иосиф Дзьоба, зас остатнього тиж на желанє вшиткых Андрей Гумецкий.

Закликано их длятого, бо того вартуют! Хотеме жыти як люде з людми, хотеме жыти з индивидуами добрыма, шырыма хоц они полякы, англыкы ци мурины, а злодіев, цыганов, ошустов, людей подлых, хоцбы мінілися патриотами русскыма женеме гет от себе, не хотеме их знати и бойкотуєме их.

Нашы рускы люде дали поарештувати в жовтні 1933 р. невинно Устьян, котры сидили в Яслі в арешті около 2 тижней, а сиди-либы може и по килька місяцев, еслибы не пос. Стапинский, поляк! Длятого мы хотіли, жебы познал нас а мы його, бо вшытко тото робил безинтересовно хибаль за „Боже за-плат“, а іздил в той справі до Горлиц, то до Ясла, то зас до Кракова ци Варшавы. По друге хотеме жебы люде знали, же маме свои звычайи и свои пісні.

Дакотры „патриоты“ кричат, та як можна кликати до себе поляка або з ним жыти, але як сами пхают свои зопсуты носы нераз и задалеко то нич злого?! Видят чуже под лісом, але свого под носом не можут узрїти.

Што до тартаку парового в Квятони, то належыт он до трьох спольников: Цымбалы Емиля, Парагуза Тимка и Антония Гумецкого а не до самого того остатнього. Был он выставлений в 1930 р. переважно за пожычены грошы, котры постепенно сплачуєся, а был выставлений як каждая институция промышлен-на на то, жебы такы Владиміры як Влад. И. Пейко не потребували толчыся по вагонах по Канаді (ч. 33 Лемка 1933 р.) и тым самым не наражали своих знищенных роботом роди-чей на біду через тото, же не вертают и не присылают пожыченых и процентованых до-ляров, але штобы они могли на місци найти роботу и жытя! Треба чоловіче розрижнити зыск от вызыску. Лемковщына тогды буде ліпше стояти, если таких и подобных инсти-

туций промышленных буде мати як найбільше. Свои люде найдут у своих роботу и грош остане у своих. Ци то буде институция кооперативна, сполкова, ци єдного чоловіка, тото неважне. Будуйме тото, што тепер можливе!

Если зас иде о сам кооператив, о упадку котрого буде написано в особой статии, то длячого Владиміра Ив. не болит голова за жыдовскы трачы на Лемковщынї, за жыдовскы родины в Устю, лем за Гумецкого, котрый 29 роков тому назад побурил стары корчмиска з жыдовскыма родинами, які му-сіли забратися з села, а на их місци побу-дувал свой русский sklep за тяжко зароблены в Америці в друцяку грошы?!

Не забывай также, што в том дому Гу-мецкого была и читальня и вечеркы, пробы и представлення театральны и што по войні, если в Устю начались представлення, то запо-чаткувал их студ. Андрей Гумецкий, котрый за свои грошы книжкы театральны спровадил и звычайно сам вшиткы ролі розписувал.

Владимире! Радиш змінити молодому сту-денту свою стару консервативну политику а взятися за нову. А мы власне вшытко тото тобі радиме зробити, штобыс больше дурниц не робил.

И як тепер має народ слухати (як радиш) таких патриотов як ты? Ци не ліпше тепер ученого, если он єст чесным, послухати?

Неправдом єст, якобы студ. Андрей Гуме-цкий пхал колинебуд наш бідный народ в ре-лигийну авантуру, противно, авантуру застал готову як вернул зо школы, а если иде в на-род, то робиг так як можна найліпше, вшиткы робит з любви до него и безинтересовно.

Не можеме скористати з твоей рады и прогнати нашего молодого Гумецкого, абс. землед. Академии, на сто вітров от себе. Але потішиме тебе. Если найдемє другого такого приятеля народа, котрый бы так любил нас як Андрей Гумецкий, то и того другого при-горнеме до себе, але таких людей в днешних часах мало.

В Устю русском, дня 22. IV. 1934.

Осиф П. Дзьоба, Мирон І. Пупчык, Коваль-чык Захар, Іоан Вовчак, Антоний А. Андрей-чин, Андрей Дзьоба, Николай Пейко, Даниил Вахновский, Порфирий Габор, Никифор Кри-ницкий, Теофиль Мацканич, Пирог Павло, Іван Даньковский, Сильвестер Ковальчык.

Вшиткы подписали власноручно.

*

Допись з Устя Руского поміщаме на отвѣт-ственность подписаных. Допись тому Редак-ция скоротила бо наша газета мала и не мо-же поміщати долгых дописей о личном ха-рактері.

—о—

Лікарства мают потанїти; має быти оголо-шений повный аптекарський цінник.

Жыдовскы газеты наричут, же Австрия иде слїдами Гитлера; жыдов выметають з урядов.

Стемплі будут змінены. Вышли новы стем-плї по 50 гр., 1 зл. и 3 зл. Стары сут важны лем до 15 мая.

Через Варшаву переїхало до Росии 300 ав-стрийских социалистов, котры втекли з Ав-стрии по преграной революций, яку недавно выкликали в Австрии.

Витос и Керник — котры утекли з Польщы — осїли, як доносят газеты в Швайцарии.

В Лодзі згорїла фабрика. Пожар зачался в часі, коли роботники были при роботі. Трьох роботников згорїло а 12 попеклося сильно.

В Кракові лишыли родичы малого хлопчы-ка на возі а сами пошли на місто. До воза пришол якыйсь злодій и казал хлопчыкови закликати маму. Хлопчык пошол за мамом, а злодій вкрал коні з возом.

Поміщайте оголошыня в газеті „Лемко“. Хто хце прислужытися нашой газеті нехай зберат оголошыня з міст и сел по-вітов Леско, Сянок, Кросно, Ясло, Горлиці и Новый Санч.

В Парыжу арештовали німецку шпйонку, ко-тра достала планы французского подводного чолна.

Там дошло на днях до демонстрации со-циалистичных и комунистичных урядников-Под парыжским ратушом демонстранты об-шмарили полицию каменями.

Английскы летчыкы Рубенг и Воллер вы-летіли 22. марта з Англии, а 6. квітня опу-стилися на землю в Австралии.

В Боливии в Полудневой Америці выбухнул бунт в военной академии. Спроваджено вой-ска, котры заатаковали бунтовников. По обох сторонах страты в убытих и раненых.

Румынский военный министр виїхав до Па-рижа для закупкы военных материялов на суму 6 миллиардов лей.

В Єрусалимі бьются жыды медже собом. — Жыды сут там поділены на дві группы, котры почали битися на улицах Єрусалимы.

3 Турции вылетіло до Москвы 5 аеропланов.

В Румынии было землетрясенє. Завалилося килька домов в Кишеневі, Галяці, Букарешті и Яссах.

Німеччына заключыла дня 26. марта зо Со-віт. Росийом торговельный уклад на 1934 рок.

ПОЧТОВЫЙ ЯЩИК.

1) Дмитро Глут, Скальник р. Жмигород. Присланы вершы може и добры, але так не-выразно написаны, же того не можеме отчы-тати. Газету высылаєме.

2) М. Каня, Ропкы п. Усте Руске. Присла-ный материял добрый, помістиме в слїдующых чыслах.

3) Членам читальні им. М. Качковского в Андреевці п. Мушына завязавшим кружок подготовлення рольничого доношу, што по-требны им информации достанут в коротком часі.

4) Юрий Бодак, Вапенне п. Липинкы: Верш добрый, помістити не можеме, бо наша газе-та не нарушат ничеїей віры ани религии. Га-зету высылаєме.

5) Лемко зо Щавника. Решту материялу присланого вами выкористаме в слїдующом чыслі

6) Громада Дальова п. Яслиска. В справі емиграции до Совітов знаме, же дакотры лю-де на власну руку зберали подписы и высла-ли прошенє до Рады Министров, штобы ми-нистерство выстаралося в Росии о землю для евентуальных емигрантов. Справа тота однак з причин обнятых законом не може быти те-пер рішена.

7) Г-ну Дру Жыдовскому, Пряшев. Дякуєме за присланы нам адресы.

Складайте Ваши ошадности

В КОМУНАЛЬНОЙ

Касі Ошадности

в Крыници.

Она дає полну гваранцию, платит добрый процент — и выплачат зараз выпо-віджены грошы.

Уділят она также пожычок на невысокий процент.